

Lomiga mo le Polokalame mo le Sauniga o le Faiva ma le Olaga Faa-Kerisiano

ME 2-8

‘OA TAUTELE MAI I LE AFIGA A LE ATUA | 1 SAMUEL 27-29

“O Fuafuaga a Tavita mo le Taua”

it-1 41

Akisa

A o fesolasolata'i Tavita mai iā Saulo, e faa-lua ona ia sulufa'i atu i vaipanoa na pulea e le tupu o Akisa. I le taimi muamua na sulu-fa'i atu ai Tavita iā Akisa, na ia faafoliga atu o se tagata valea ina ua masalomia o ia o se fili, ma i'u ai ina faasa'oloto o ia e Akisa. (1Sa 21:10-15; SI 34:UT; 56:UT) I le taimi lona lua, na faatasi atu ai iā Tavita le to'a 600 o tagata totoa ma o latou aiga, ma na tofia ai i latou e Akisa e nonofo i Sekeleka. A o nonofo i inā Tavita ma ona tagata mo le tausaga ma le fā masina, na manatu Akisa na latou osofa'ia aai o Iuta. Peita'i, na osofa'ia e Tavita tagata Kasuri, tagata Kisera ma tagata Amaleka. (1Sa 27:1-12) Na matuā taulau Tavita i le faasesēina o Akisa ma na tofia o ia e Akisa e puipuia o ia, a o faamaopoopo e tagata Filisitia se osofa'iga i le tupu o Saulo. Ae ona o le faatauana'u atu o isi “alii ua pule faatasi” o Filisitia, na toe faafo'i atu ai Tavita ma ona tagata i Sekeleka. (1Sa 28:2; 29:1-11) Ina ua ave'a Tavita ma tupu ma faasagatau atu iā Kata, e le'i fasio-tia Akisa ma na soifua pea se'ia oo i le pulega a Solomona.—1Tu 2:39-41.

w21.03 4 ¶8

Uso Talavou—E Faapefea Ona Maufaatua-tuaina Outou e Isi?

⁸ Se'i manatu i se isi lu'i na fesaga'ia e Tavita. Ina ua uma ona faauuina Tavita e ave'a ma tupu, na faatalitali o ia mo le tele o tau-saga se'ia ave'a aloa'ia o ia ma tupu o Iuta.

(1 Samu. 16:13; 2 Samu. 2:3, 4) I lenā taimi umi, o le ā na fesoasoani iā te ia e faatali-tali ai ma le onosa'i? Na ua'i atu Tavita i mea na mafai ona ia faia nai lo le lofitūina i le lotovaivai. O se faaa'oa'oga, a o fesola-solata'i Tavita i nuu o Filisitia, na ia faaaogā lenā avanoa e tau ai ma fili o Isaraelu. O lona faia faapea, na ia puipuia ai tuaoi o Iuta.—1 Samu. 27:1-12.

it-2 245 ¶6

Pepelo

E moni o loo ta'usalaina i le Tusi Paia le pepelo ma le loto i ai, peita'i e lē uiga atu ai e tatau i se tasi ona faailoa atu faama-talaga moni i ē e lē mana'omia ona iloa. Na fautua mai Iesu Keriso: “Aua ne'i avatua mea paia i ta'ifau, aua fo'i ne'i lafoina a outou penina i puaa, ina ne'i soli ai i o latou vae, ma liliu mai ai ma saeia outou.” (Mat 7:6) O lea, na iai taimi e le'i faama-talaina atu ai e Iesu faamatalaga uma, pe avatu ni tali ma'oti i ni fesili na ono lamatia ai o ia. (Mat 15:1-6; 21:23-27; Ioa 7:3-10) O le tatou vaaiga fo'i lenā e tatau ona iai i mea na faia e Aperamo, Isaako, Raava ma Elisaia, ina ua latou faasesēina pe faailoa atu fo'i faamatalaga uma i ē e lē tapua'i iā Ieova.—Ke 12:10-19; mata. 20; 26:1-10; Ios 2:1-6; Ia 2:25; 2Tu 6:11-23.

Sa'ili'iliga mo 'Oa Faaleagaga

w10-E 1/1 20 ¶5-6

Pe e Mafai Ona Fesoasoani Mai Ē ua Mali-liu?

Ua ta'ua i le Tusi Paia, pe a maliu se tasi, “e toe fo'i atu o ia i le eleele” ma ‘e fauma-tia ona manatunatuga.’ (Salamo 146:4) Na iloa e Saulo ma Samuelu, na ta'usalaina e le Atua le fesoota'i atu i ē e sa'ili i agaga. I se

taimi muamua atu, na ta'imua ai Saulo i le aveeseina o faiga faaagaga i le nuu.—Levítico 19:31.

Se'i mafaufau i ai. Pe ana faapea e ola pea Samuelu o se agaga, po o le a ia solia le tulafono a le Atua ma fesoota'i atu iā Saulo e ala i sē e sa'ili i agaga? Na lē toe fia talanoa Ieova iā Saulo. Pe e mafai la e sē e sa'ili i agaga ona faamalosia le Atua o Lē e ona le malosi uma lava e talanoa iā Saulo e ala mai iā Samuelu o lē ua maliu? E leai. E manino mai, o le “Samuelu” lenei e lē o faasino atu i le perofeta faamaoni a le Atua. Ae o ia o se temoni, na faafoliga mai iā Samuelu.

ME 9-15

‘OA TAUTELE MAI I LE AFIGA A LE ATUA | 1 SAMUELU 30-31

“Faamalosia Oe Lava i le Fesoasoani a Ieova Lou Atua”

w06 8/1 28 ¶12

Ia Mata'u iā Ieova ma ia Fiafia!

¹² O le mata'u o Tavita iā Ieova, na ia faia ai nisi mea e ese mai le taofia o le faia o le mea sesē. Na faamalosia ai o ia e gaoioi maumaua'i ma le atamai pe a fesaga'i ma tulaga faigatā. E tausaga atoa ma masina e fā o lalafi Tavita ma ona tagata mai iā Saulo i Sekeleka i Filisitia. (1 Samuelu 27:5-7) I se isi aso a o ō ese atu tane o le nuu, na osofa'ia ai e Amaleka le aai ma susunu i lalo, ma ave fo'i avā a tamāloloa, o atalii ma afafine, ma lafumanu. Ina ua fo'i ane Tavita ma ona tagata ma vaaia le mea ua tupu, sa latou fetagisi. Na vave ona liua lenā faavauvau i le lotoa, ma na tautala tagata o Tavita o le a latou fetogi iā te ia. E ui sa mafatia Tavita ae sa le'i faavaivai ai. (Faataoto 24:10) O lona mata'u i le Atua na ia liliu atu ai iā Ieova mo se fesoasoani, ma sa 'faa-

malosia o ia e Ieova.' O inā na mafai ai e Tavita ma ona tagata ona latou manumalo mai ia Amaleka, ma toe faafo'i mai mea uma na aveesea.—1 Samuelu 30:1-20.

w12 4/15 30 ¶14

E Leoleomaluiina i Tatou e Ieova mo le Faaolataga

¹⁴ Na fesaga'ia e Tavita le tele o tulaga faigatā i lona olaga. (1 Samu. 30:3-6) O loo ta'ua i le Tusi Paia na silafia e Ieova faalogona o Tavita. (**Faitau le Salamo 34:18; 56:8.**) E silafia lelei fo'i e le Atua o tatou faalogona. Pe a 'momomo o tatou loto' pe “nutimomoia” fo'i, o le a Ia faalatalata mai iā i tatou. Ua mafai e lenei mea ona aumaia iā i tatou faamāfanafanaga, e pei o Tavita o lē na pese: “Ou te fiefia ma olioli i lou alofa faamaoni, ona ua e silasila mai i lo'u pua-puaga; ua e silafia fo'i o'u mafatiaga.” (Sala. 31:7) Ae e sili atu mea e faia e Ieova nai lo o le tau ina iloa o o tatou popolega. E na te faamalosia i tatou e ala i faamāfanafanaga ma faalaeiauga. O se tasi o auala ua ia faia ai faapea, e ala mai i sauniga faa-Kerisiano.

Sa'ili'iliga mo 'Oa Faaleagaga

w05 3/15 24 ¶8

Manatu Tāua Mai le Tusi Muamua a Samuelu

30:23, 24. Ua faaalua i lenei filifiliga na faavae i le Numera 31:27, e tāua iā Ieova i latou e auauna ma le felagolagoma'i i le faapopotoga. O lea la, po o le ā lava o tatou faia, se'i o tatou “faia ma le loto, peisea'i ua faia i le Alii, a e lē o tagata.”—Kolose 3:23.

ME 16-22

‘OA TAUTELE MAI I LE AFIGA A LE ATUA | 2 SAMUELU 1-3

“O le ā e Tatou te A’oa’oina Mai i le Pese ‘O le Aufana’?”

w12 10/15 15 ¶11

O le ā le Agaga o Loo E Faaalia?

¹¹ Ia tatou manatua, o le finagalo o Ieova ua ia faaaogā ai toeaina e ‘leoleoina le faapotopotoga a le Atua.’ (Gal. 20:28; 1 Pete. 5:2) E atamai ona tatou faaaloalo i faatula-gaga a Ieova, e tusa po o i tatou o ni toeaina pe leai. O le iai o se vaaiga sa’o o le a tatou lē naunau ai e maua faaeaga ma le tulaga pule. Ina ua masalosalo Saulo o loo taumafai Tavita e faoa lona tulaga tautupu, ona ia ‘lamalama lea o Tavita.’ (1 Samu. 18:9) O lenā manatu sesē, na ia taumafai ai loa e fasiotia Tavita. E lē tatau ona tatou faatāua na’uā le tulaga pule e pei o Saulo, nai lo o lea, e tatau ona tatou faata’ita’i iā Tavita. E ui i faiga lē tonu na fesaga’ia e Tavita, ae na ia faaalua pea le faaaloalo i ē na tofiaina e le Atua.—**Faitau le 1 Samuelu 26:23.**

w12 4/15 10 ¶8

O le Faalata o se Vala o le Faailoga o Aso e Gata Ai!

⁸ O loo faamatalaina fo’i i le Tusi Paia le to’atele o isi tagata faamaoni. O le a tatou iloilo ina ni tagata se to’alua, ma ni lesona e tatou te a’oa’oina mai iā i la’ua, e amata mai i se tagata o lē na faamaoni iā Tavita. Na ono avea Ionatana le atalii ulumatua o le tupu o Saulo, ma sulii o le nofoālii o Isaraelu. Peita’i, na filifilia e Ieova Tavita. Na faaaloologia e Ionatana le filifiliga a le Atua, ma e le’i lotoleaga iā Tavita. Ae sa ‘pipiimau le loto o Ionatana i le loto o Tavita,’ ma na tautō atu Ionatana o le a faamaoni iā te ia. Na faaaloologia fo’i e Ionatana le avea ai o Tavita ma tupu, e ala i le avatu iā te ia o “ona ofu, o lana pelu, o lana ‘aufana, ma lona fusipa’u.” (1 Samu. 18:1-4) Sa faia tau-

mafaiga uma a Ionatana ina ia ‘faamalosia ai le faatuatua o Tavita,’ e oo lava i le tuu o lona ola i se tulaga lamatia ina ia puipuia ai Tavita mai iā Saulo. Na faamaoni Ionatana ma faapea atu iā Tavita: “E avea lava oe ma tupu o Isaraelu, o a’u fo’i ou te pito atu iā te oe.” (1 Samu. 20:30-34; 23:16, 17) E lē-tioa ina ua mavae le maliu o Ionatana, sa faaalua le faanoanoa ma le alofa o Tavita mo ia, i se pese faavauvau.—2 Samu. 1:17, 26.

Sa’ili’iliga mo ‘Oa Faaleagaga

it-1 369 ¶2

Uso

E mafai fo’i ona ta’ua i latou e tutusa o latou fuafuaga ma sini o “uso.” O se faata’ita’iga, na ta’ua e Hiram le tupu o Turo le tupu o Solomona o lona uso. E lē gata ona o le tutusa o o la tulaga, ae na tutusa fo’i o la sini i le saunia o laupapa ma isi mea mo le malumalu. (1Tu 9:13; 5:1-12) “Faauta! Ma’eu le lelei ma le matagofie pe a nonofo faatasi o uso i le autasi!” O upu nei na tusia e Tavita ua faaalua mai ai le manatu, e lē na o faiā faaleaiga e mafai ona maua ai le filemu ma le autasi. (Sl 133:1) O le mea moni, na ta’ua e Tavita Ionatana o lona uso ona o le māfana o le la faiā ae e lē ona o se faiā faaleaiga. (2Sa 1:26) E mafai fo’i ona ta’ua o uso ni uō e tutusa uiga ma amioga, e tusa lava pe leaga.—Fat 18:9.

ME 23-29

‘OA TAUTELE MAI I LE AFIGA A LE ATUA | 2 SAMUELU 4-6

“Faatumauiina o le Mata’u Iā Ieova”

w05 5/15 17 ¶8

Manatu Tāua Mai le Tusi e Lua a Samuelu

6:1-7. E ui lava sa lelei faanaunauga o Tavita ae o lona taumafai e avatu le Atolaau i

le fata faataavalevale, sa lē usitaia ai le faatonuga a le Atua ma oo ai i tulaga faanoanoa. (Esoto 25:13, 14; Numera 4:15, 19; 7:7-9) O le tago atu o Usa e taofi le Atolaau, e faaaliala ai fo'i e lē avea faanaunauga lelei ma mea e suia ai mea e faafinagaloina e le Atua.

w05 2/1 27 ¶20

E Fai Mea Tonu Ieova i Taimi Uma

²⁰ Ia manatua, e ao ona masani lelei Usa i le Tulafono. O le Atolaau, na fai ma sui o le afio ai o Ieova. Na faamatala patino e le Tulafono, e lē tatau ona pa'i atu i ai se tasi e le'i faatagaina, ma na ma'oti mai e fasio-tia ē e solia lenā tulafono. (Numera 4:18-20; 7:89) O lea la, o le feavea'iina o lenā atolaau paia, e lē o se galuega e manatu māmā i ai. E foliga mai o Usa o se sa Levi (ae lē o se ositaulaga), o lea sa tatau ona masani lelei o ia i le Tulafono. E lē gata i lea, i tausaga ua te'a, na avatu ai le Atolaau e tuu i le fale o lona tamā. (1 Samuelu 6:20–7:1) Na tuu ai i inā mo le 70 tausaga, se'ia oo ina fuafua Tavita e toe ave. O lea la, mai lava i lona la'itiiti na iloa lelei e Usa tulafono e faatatau i le Atolaau.

w05 2/1 27 ¶21

E Fai Mea Tonu Ieova i Taimi Uma

²¹ E pei ona ta'ua muamua, e silafia e Ieova loto. Talu ai ua ta'ua i le Afioga a le Atua, na faaumatia Usa ona o “lona sesē,” atonu na silafia e Ieova ni faanaunauga manatu faapito ia e lē o ta'ua i le tala. Pe na avea Usa o se tagata manatu faamaualuga pe sopo tapulaa? (Faataoto 11:2) Pe na avea lona ta'ita'ia i luma o tagata o le Atolaau, lea na leva ona tuua i lona aiga, ma mäfua-aga e faamaualuga ai? (Faataoto 8:13) Pe na lē faatuatua Usa ma mafaufau ai ua faapuupuaina le aao o Ieova e puipua ai le atolaau paia lea e faailogaina ai Lona afio

ai? Po o le ā lava le tulaga, e mafai ona tatou mautinoa na faia e Ieova le mea sa'o. E lē taumatea na ia silafia faanaunauga i le loto o Usa lea na mäfua ai ona faaoo vave le faasalaga.—Faataoto 21:2.

Sa'ili'iliga mo 'Oa Faaleagaga

w96 4/1 29 ¶1

Ia Tuuina Atu Pea ia Ieova Ou Popolega

I le avea o Tavita ma tupu sa tatau ona ia faia se vaega mo lenei mea. O lana gaoioiga ua faaaliala ai e faapea e oo lava ia i latou o ē e lelei la latou faiā ma Ieova e mafai ona lē lelei la latou tali atu i nisi tulaga faigata. Muamua lava na toatama'i Tavita. Ona oso a'e lea o lona fefe. (2 Samuelu 6:8, 9) Na matuā tofotofoina le la faiā maufaatuatua-ina ma Ieova. O lenei mea na aliali mai ai lona lē taulau i le tuuina atu ia Ieova o ona popolega, ina ua ia lē mulimuli i ana poloaiga. Pe lē o le tulaga foi lea ia i tatou i nisi taimi? Pe o tatou tuua'ia ea Ieova mo faafitauli e oo mai ona o lo tatou lava lē amanaiaina o ana faatonuga?—Faataoto 19:3.

ME 30–IUNI 5

'OA TAUTELE MAI I LE AFIGOA A LE ATUA | 2 SAMUELU 7-8

“Osia e Ieova se Feagaiga ma Tavita”

w10 4/1 20 ¶3

'E Mausali Lou Malo'

Na fialia le finagalo o Ieova i le faanaunauga o le loto o Tavita. I le tali atu i le faamaoni o Tavita ma e tusa ai ma valoaga, na osia ai e le Atua se feagaiga ma Tavita e faapea, e faatūina e Ia se tasi i le aiga tautupu o Tavita, o le a pule e faavavau. Na faailoa atu e Natano iā Tavita le folafolaga aloa'ia a le Atua: “E mausali lou aiga

ma lou malo i ou luma i aso uma lava; e matuā faatumauiina fo'i lou nofoālii i aso uma.” (Fuaiupu e 16) O ai le Suli tumau o lenei feagaiga, o Lē o le a pule e faavavau? —Salamo 89:20, 29, 34-36.

w10 4/1 20 ¶4 **‘E Mausali Lou Malo’**

O Iesu le Nasareta, o sē e tupuga mai iā Tavita. Ina ua faalauiloa mai le fanau mai o Iesu, na faapea mai le agelu: “E foa’iina atu e Ieova le Atua iā te ia le nofoālii o Tavita lona tamā, ma o le a fai o ia ma tupu i le aiga o Iakopo e faavavau, o lona malo fo’i e leai sona gataaga.” (Luka 1:32, 33) O lona uiga, na faataunuuiina iā Iesu Keriso le feagaiga ma Tavita. O lea la, e lē o le filifiliga a tagata na avea ai o ia ma pule, ae e ala i le folafolaga aloa’ia a le Atua, ua maua ai e ia le aiā e pule ai e faavavau. Se’i o tatou manatua, e faataunuuiina lava folafolaga a le Atua.—Isaia 55:10, 11.

w14 10/15 10 ¶14 **Ia Mausali Lou Faatuatua i le Malo**

¹⁴ Se’i iloilo le folafolaga na fai atu e Ieova i le tupu o Isaraelu, o Tavita, e ala i le **feagaiga ma Tavita**. (Faitau le 2 Samuelu 7: 12, 16.) Sa osia e Ieova lenei feagaiga ma Tavita a o faagasolo lana pulega i Ierusalem, ma folafola atu i ai o le a tupuga mai iā te ia le Mesia. (Luka 1:30-33) Sa faailoa atu e Ieova faamatalaga atili e faatatau i le gafa e tupuga mai ai le fanau, ma o le a iai i se suli o Tavita “le pule faaletulafono” i le nofoālii o le Malo faa-Mesia. (Eseki. 21:25-27) E mautinoa o le a “matuā faatumauiina” le pulega a Tavita e ala iā Iesu. O le a ‘tumau pea le fanau a Tavita i aso uma lava, ma lona nofoālii e pei o le lā.’ (Sala. 89:34-37) Ioe, o le a lē taitai ona faaleagaina le pulega a le Mesia, ma o le a tumau e faavavau faamanuiaga e maua mai ai!

Sa’ili’iliga mo ‘Oa Faaleagaga

it-2 206 ¶2 **Aso e Gata ai**

Valoaga a Palaamo. A o le’i ulu atu Isaraelu i le Nuū Folafoalaina na fai atu le perofeta o Palaamo iā Palako le tupu o Moapi: “O le mea lea, se’i o’u fautua atu ai iā te oe, i le mea o le a faia mulimuli ane e lenei nuu [Isaraelu] iā te outou i le faai’uga o aso. . . . O le a sau se fetu mai iā Iakopo, o le a tula’i mai se tootoo mai i Isaraelu. O le a ia vaeluaina le muāulu o Moapi ma ipu a atalii uma o loo vevesi i le taua.” (Nu 24:14-17) O le faataunuuga muamua o lenei valoaga, na avea ai Tavita o le “fetu” lea na pulea tagata Moapi. (2Sa 8:2) Na amata fo’i “le faai’uga o aso” ina ua avea Tavita ma tupu. Talu ai na faaata mai e Tavita le taimi na avea ai Iesu ma Tupu Faa-Mesia, e mafai fo’i ona faatatau atu lenei valoaga i le taimi o le a faato’ilaloina ai e Iesu ona fili.—Isa 9:7; SI 2:8, 9.

IUNI 6-12

‘OA TAUTELE MAI I LE AFIGA A LE ATUA | 2 SAMUELU 9-10

“Na Faaalia e Tavita le Alofa Faamaoni”

w21.11 9 ¶7 **Ia Faaauau Pea Ona Faaalia le Alofa Faamaoni o le Tasi i le Isi**

⁷ O le eseese e o le faamaoni e pei ona talanoaina i le palakalafa e 6 ma le alofa faamaoni, o le uuna’iga e faaalia ai e tagata lenā uiga. I le Tusi Paia, aiseā na faaalia ai e tagata o le Atua le alofa faamaoni? Na uuna’ia tagata o le Atua e faaalia le alofa faamaoni ona na latou manana’o ai, ae lē ona o se tiute tauave e tatau ona latou faia. Se’i mātau le faaa’oa’oga a Tavita. Na uuna’ia o ia e lona loto e faaalia le alofa faamaoni i

lana uō pele o Ionatana, e ui lava na tau-mafai le tamā o Ionatana e fasioti o ia. I tausaga mulimuli ane ai ina ua mavae le maliu o Ionatana, na faaauau pea ona faa-alia e Tavita le alofa faamaoni iā Mefiposeta, le atalii o Ionatana.—1 Samu. 20:9, 14, 15; 2 Samu. 4:4; 8:15; 9:1, 6, 7.

w05 5/15 17 ¶12

Manatu Tāua Mai le Tusi e Lua a Samuelu

9:1, 6, 7. Na tausia pea e Tavita lana folafolaga. E ao fo’i ona tatou taumafai e fai mea ua tatou tautō e fai.

w02 2/15 14 ¶10

Na Latou Faafetaia’ia Mea Matuitui i o Latou Tino

¹⁰ Ona o le alofa tele o le tupu o Tavita mo Ionatana, na ia faaalai ai le agalelei iā Mefiposeta i nai tausaga mulimuli ane ai. Na tuuina atu e Tavita meatotino uma a Saulo iā te ia ma tofia le auauna a Saulo o Sipa e avea ma lē e vaaia lenei fanua. Na ta’u atu fo’i e Tavita iā Mefiposeta e faapea: ‘E le aunoa ona e ‘ai i la’u laoi’ (2 Samuelu 9:6-10) E mautinoa na faamāfanafanaina Mefiposeta i le agalelei o Tavita ma na fe-soasoina lea tulaga e faaitiitia ai le tigā o le lē atoatoa o lona malosi. Ma’eu se lesonelelei ua maua mai ai! E tatau fo’i ona tatou faaalai le agalelei iā i latou o loo tauivi ma le mea matuitui i le tino.

Sa’ili’iliga mo ‘Oa Faaleagaga

it-1 266

‘Ava

Na manatu le to’atele o tagata i Sasa’e anamua e aofia ai ma tagata Isaraelu, o le ‘ava o se mea e tautele ma na faamamaluina ai se tane. Na faasā i le tulafono a le Atua na tuuina atu iā Isaraelu le sele faapupuu o lauulu i le vā o mata ma taliga faapea le ‘ava atoa. (Le 19:27; 21:5) Na faia lenei tulafono

ona o se tū faalotu i nisi tagata faapaupau le sele mamā o o latou ‘ava.

IUNI 13-19

‘OA TAUTELE MAI I LE AFIGA A LE ATUA | 2 SAMUELU 11-12

“Aua Ne’i Pulea Oe e Faanaunauga Leaga”

w21.06 17 ¶10

E Mafai Ona E Sao Mai i Mailei a Satani!

¹⁰ O le mana’o tele na galo ai i le tupu o Tavita mea na avatu e Ieova iā te ia, e aofia ai le tamaoaiga, se tulaga taualoa ma le faato’ilaloina o ona fili. Na faailoa mai e Tavita lona lotofaafetai i le ‘matuā tele ma le lē mafaitaulia’ o meaalofo a le Atua. (Sala. 40:5) Ae na iai le taimi na galo ai iā Tavita meaalofo a Ieova. E le’i faamalieleina o ia ae na mana’o tele. E ui ina tele avā a Tavita, ae na tu’inanau o ia i le avā a se isi tamāloa. O le fafine o Patisepa ma o lana tane o Uria le sa Heti. Na manatu faapito Tavita ma na la feusua’i ma Patisepa ma tō ai le fafine. Na matuā leaga le mea na fai e Tavita, ae na ia toe faia se isi mea na sili atu ona leaga. Na ia fafau se auala ina ia fasiotia ai Uria. (2 Samu. 11:2-15) O le ā nai le mafau-fau o Tavita? Pe na manatu o ia e lē o silafia e Ieova lana agasala na fai? E ui o Tavita o se auauna faamaoni a Ieova, ae na lolo atu o ia i le mana’o tele ma na oo ai le tele o mafatiaga iā te ia. Ae na ta’utino e Tavita lana agasala ma faaalai le salamo. Ma’eu lona lotofaafetai i lona toe mauaina o le finagalo malie o Ieova!—2 Samu. 12:7-13.

w19.09 17 ¶15

Ia Lotomalie e Gaua’i iā Ieova—Aiseā ma e Faapefea?

¹⁵ Na tofia e Ieova Tavita e avea ma ulu o lona aiga, ae ia pule fo’i i le malo atoa o

Israelu. A o avea Tavita ma tupu na tele se pule na iā te ia. E iai taimi na ia faaagā-sesē ai lenā pule, ma ia faia ai agasala matuiā. (2 Samu. 11:14, 15) Peita'i, na faaalia lona gaua'i iā Ieova e ala i le talia o a'oa'iga. Na faailoa atu e Tavita mea o loo i lona loto iā Ieova, e ala i le tatalo. Ma ia taumafai malosi e usita'i i a'oa'iga a Ieova. (Sala. 51:1-4) E lē gata i lea, na lotomaulalo Tavita e talia fautuaga lelei mai i tane ma fafine. (1 Samu. 19:11, 12; 25:32, 33) Na a'oa'o e Tavita ni lesona mai i ana mea sesē, ma ia faamuamua i lona olaga lana auau-naga iā Ieova.

w18.06 17 ¶7

Ia Toleni Lou Lotofuatiaifo i Tulafono ma Mataupu Silisili a le Atua

⁷E tatou te lotofaafetai fo'i, ona e tau lē mana'omia ona tatou tofo i āuga o le solia o tulafono a le Atua, ina ia a'oa'oina mai ai ni lesona tāua. E mafai ona tatou a'oa'oina ni lesona mai i mea sesē na faia e isi o loo faamauina i le Afioga a le Atua. Ua faapea mai le Faataoto 1:5: "O le tagata atamai e faalogo ma ave i fale faatonuga." O le mea moni, o loo tatou maua faatonuga e sili ona lelei mai i le Atua, pe a tatou faitau ma manatunatu loloto i tala o mea moni na tutupu i olaga o tagata i le Tusi Paia. O se faata'ita'iga, se'i manatu i tigā na oo i le tupu o Tavita ina ua lē usiusita'i i le poloa'iga a Ieova, ma la faia ai le mulilua ma Patesepa. (2 Samu. 12:7-14) A o faitau ma manatunatu loloto i lenei tala, ia fesili ifo iā i tatou lava: 'Na ono mafai faapefea ona 'alofia e le tupu o Tavita tigā ona o lona faia o le mulilua ma Patesepa? Pe a ou fesaga'ia fo'i se tofotofoga faapea, po o le a ou maua le malosi e tetee atu ai? Po o le a ou sola ese e pei o Iosefa, po o le mea o le a ou lolo atu e pei o Tavita?' (Kene. 39:11-15) O le manatunatu i āuga leaga o le faia o le aga-

sala, e mafai ona faamallosia ai o tatou loto ina "ia 'ino'ino i le leaga."

Sa'ili'iliga mo 'Oa Faaleagaga

it-1 590 ¶1

Tavita

Peita'i, na silasila mai Ieova ma faaalialia i lumāmea lenei mea matuā leaga. Pe ana faapea na faataga e Ieova ni faamasino faaletagata e taulima le mataupu a Tavita ma Patesepa e ala i le Tulafono faa-Mose, semanū e fasiotia i la'ua, ma ma'imau ai le ola o le pepe o loo i le manava o le tinā. (Te 5:18; 22:22) Peita'i, na taulima e Ieova le mataupu ma faaalialia le alofa mutimutivale iā Tavita ona o le feagaiga o le Malo, le faaalialia e Tavita o le alofa mutimutivale ma ona na silafia e Ieova le salamō na faaalialia e Tavita ma Patesepa. (2Sa 7:11-16; 1Sa 24:4-7; faatusatusa i le Ia 2:13; Sl 51:1-4) E ui i lea, e le'i puipuia i la'ua mai i faasalaga uma, ona na fetalai Ieova e ala i le perofeta o Natano: "Ou te faatupuina mai i lou lava aiga o puapuaga e oo iā te oe."—2Sa 12:1-12.

IUNI 20-26

'OA TAUTELE MAI I LE AFIGOA A LE ATUA | 2 SAMUEL 13-14

"O le Manatu Faapito o Amanono na I'u ai i Āuga Leaga"

it-1 32

Apisaloma

Fasiotia Amanono. Na iai le tuafafine o Apisaloma e igoa iā Tamara, ma lona 'afa uso matua e igoa iā Amanono. O le aulelei tele o Tamara na māfua ai ona alofa faavalea Amanono iā te ia. Na faatagā ma'i Amanono ina ia sau ai Tamara e fai se mea'ai mo ia, ona ia faamalosi ai lea iā te ia. Na suia le alofa faavalea o Amanono iā Tamara

i le matuā 'ino'ino ma tuliesea ai o ia. Na saeia e Tamara lona ofu faapitoa na iloa ai o ia o se afafine taupou a le tupu ma tuu lefulefu i luga o lona ulu. Na faafetaia'ia o ia e Apisaloma ma na vave faailoa atu e Apisaloma lona masalomia o Amanono. E iloa mai iinei, ua leva ona iloa e Apisaloma faanaunauga leaga a lona 'afa uso. Peita'i na faatonu e Apisaloma lona tuafafine e aua le faia se tagi e faatatau i le mataupu ma ave o ia e faanofo i lona fale.—2Sa 13: 1-20.

w17.09 5 ¶11

Ia Atia'e le Amio Pulea

¹¹ O loo ta'ua fo'i i le Tusi Paia faaa'oa'oga lapata'i o ē e le'i faaalua le amio pulea e tusa ai o feusua'iga, ma āuga leaga na i'u i ai. O so o se tasi o loo feagai ma lenei faaosoosoga e pei o Kim, e lelei ona manatunatu i le taule'ale'a e leai se poto masani lea e ta'ua i le Faataoto mataupu e 7. Ia mafaufau fo'i i le gaioioiga na faia e Amanono ma i'uga matagā na i'u i ai. (2 Samu. 13:1, 2, 10-15, 28-32) E mafai ona fesoasoani mātua i a latou fanau ia atia'e le amio pulea ma le atamai e tusa ai o faigā-uō ma le isi itupā, e ala i le talanoaina o lenei mataupu i le tapua'iga a le aiga e faa-aogā ai nei faaa'oa'oga faale-Tusi Paia.

it-1 33 ¶1

Apisaloma

Ua mavae le lua tausaga. Ua oo i le taimi fiafia o le seleina o fulufulu o mamoe, o lea na faamaopoopo ai e Apisaloma se faiga'ai i Paala-asora lea e pe ā ma le 22km i le itu i mātū i sasa'e o Ieruselema. Na ia valaaulia atalii o le tupu ma Tavita. Ina ua lē talia e Tavita le valaaulia, na tauanau o ia e Apisaloma e auina atu Amanono lana ulumatua e suitulaga iā te ia. (Fat 10:18) I le faiga'ai, ina ua "fiafia le loto" o Amanono i le uaina, na

faatonuina e Apisaloma ana auauna e fasio-tia o ia. Na toe fo'i isi atalii o le tupu i Ieruselema ae sola Apisaloma i le tamā o lona tinā, o se tagata Suria i le malo o Kasuri o loo i le itu i Sasa'e o le Sami o Kalilaia. (2Sa 13:23-38) Ua oo mai le "pelu" na valoia e le perofeta o Natano i le "aiga" o Tavita, ma o le a iai pea i lona olaga atoa.—2Sa 12:10.

Sa'ililiga mo 'Oa Faaleagaga

g05 4/8 28-29

O Lē Fea Aulelei e Sili Ona Tāua?

Ae e le'i faapena Apisaloma, o se tasi o atalii o Tavita. O ia o se tagata e le'i tausaa'ia i isi e ui o se tagata e aulelei tele. Ua fai mai le Tusi Paia: "Sa leai se tagata i Israelu uma e pei o Apisaloma ona aulelei; sa matuā viia ai lava o ia; e afua mai i ona alofivae e oo i lona tumua'i, e leai se pona iā te ia." (2 Samuelu 14:25) Ae na foua e Apisaloma le nofoaiga a lona tamā ona o lona faanaunauga faasausili. Na oo fo'i ina alu o ia i palake a lona tamā. Na to'asā Ieova iā te ia ma i'u ai ina oti i se auala tugā.—2 Samuelu 15:10-14; 16:13-22; 17:14; 18:9, 15.

Pe e te fiafia la iā Apisaloma? O le mea moni, e leai. A fua atu i ai, e lē o ia o se tagata lelei. E le'i aogā lona aulelei ona o lona faasausili ma lona lē faamaoni, ma e le'i taofia ai fo'i lona i'uga leaga. Ae e tele ni faata'ita'iga o loo i le Tusi Paia o ni tagata e popoto ma e tausaa'ia o latou uiga, ae e lē o ta'ua o latou foliga pe faape'i. E manino la, o le mea e sili ona tāua, o o latou uiga tausaa'ia.

IUNI 27-IULAI 3

'OA TAUTELE MAI I LE AFIGA A LE ATUA | 2 SAMUELU 15-17

“Na Fouvale Apisaloma Ona o le Faa- mauluga”

w16.02 28 ¶10

O Lesona Mai i Auauna Faamaoni a Ieova

E le'i faamaoni fo'i i le Atua Apisaloma le atalii o Tavita, ona e le'i lotomaulalo o ia. Na mana'o o ia e avea ma tupu ma o le māfuaaga lea na ia faia ai “se kariota mo ia, atoa ma solofanua, ma tagata e to'a-lima sefulu e taufetuli i ona luma.” (2 Samu. 15:1) Na ia taumafai e faaliliu tagata Isara-elu ina ia faamaoni iā te ia. Na ia taumafai fo'i e fasiotia lona tamā, e ui na ia iloa sa tofia e Ieova Tavita e avea ma tupu o Isara-elu.—2 Samu. 15:13, 14; 17:1-4.

w12 7/15 13 ¶5

Auauna i le Atua o le Sa'olotoga

⁵ O loo iai i le Tusi Paia le tele o faaa'oa'oga o i latou na avea o ni taa'iga leaga i isi. O se tasi o i latou o Apisaloma, se tasi o atalii o le tupu o Tavita, ma o se alii e aulelei tele. Peita'i, i le pei o Satani, na amata ona tuputupu a'e i lona loto se faanaunauga leaga. Sa mana'o o ia e avea ma tupu nai lo o lona tamā, e ui lava e leai sana aiā i lenā tulaga. Ina ia maua le mea sa ia mana'o i ai, na taumafai Apisaloma e faatalitonu tagata, e sili atu lona naunau e fesoasoani iā i latou nai lo o le tupu. E pei lava ona faia e le Tiapolo i le faato'aga i Etena, sa faapena fo'i ona faatalitonuina e Apisaloma tagata e faapea, o loo ia manatu mamafa iā i latou, ae i le taimi e tasi, sa ia faia se tala taufaaleaga e faatatau i lona tamā.—2 Samu. 15:1-5.

it-1 1083-1084

Heperona

I nai tausaga mulimuli ane, na toe fo'i ai le atalii o Tavita o Apisaloma i Heperona, ma

taumafai e foua le tulaga tautupu o lona tamā. Peita'i e le'i taulau o ia. (2Sa 15:7-10) Atonu na filifilia e Apisaloma le aai o Heperona e amata ai lana fouvalega, ona na iai se taimi na avea ai lenei aai ma laumua o Iuta, ma o i inā na ola a'e ai o ia. Mulimuli ane, na toe fausia Heperona e le tupu o Reopoamo, le atalii o le atalii o Tavita. (2No 11:5-10) Ina ua mavae le faatafunaga o Iuta e tagata Papelonía ma le toe fo'i mai o tagata Iutaia na faaunuua, na nonofo nisi tagata Iutaia i Heperona (Kiriata-arapa).—Ne 11:25.

Sa'ililiga mo 'Oa Faaleagaga

w18.08 6 ¶11

Po ua E Maua Faamatalaga Moni?

¹¹ Atonu e iai taimi e tigā ai o tatou faaloga, pe a faia e nisi ni nai faamatalaga moni po o faamatalaga e lē atoatoa e faatatau iā i tatou. Se'i iloilo le faaa'oa'oga i le tupu o Tavita ma Mefiposeta. Na lotoalofa ma agalelei Tavita iā Mefiposeta, ma toe faafo'i atu iā te ia fanua uma o Saulo, le tamā o lona tamā. (2 Samu. 9:6, 7) Ae i se taimi mulimuli ane, na maua ai e Tavita se tala lē lelei e faatatau iā Mefiposeta. E aunoa ma le faamautinoa pe e moni na faamatalaga, na filifili Tavita e aveese fanua uma mai iā Mefiposeta. (2 Samu. 16:1-4) Ina ua toe talanoa mulimuli ane Tavita iā Mefiposeta, na iloa ai e Tavita lona sesē ma toe faafo'i atu ai iā Mefiposeta se vaega o fanua. (2 Samu. 19:24-29) Na mafai ona 'alofia nei faiga lē tonu pe ana taumafai Tavita e sa'ili faamatalaga moni, nai lo o le vave fai o se faai'uga e fua i faamatalaga e lē atoatoa.